

পঞ্চম অধ্যায়
নীলকর ও নীলচাষী

আগের অধ্যায়ে যশোর জেলায় নীল চাষের প্রেক্ষাপট, বিভিন্ন নীল কনসার্ন, এদের অবস্থান ও উৎপাদন প্রভৃতি সম্পর্কে আলোচনা করা হয়েছে। এ অধ্যায়ে নীলকর ও নীলচাষীর সম্পর্ক, এ সম্পর্ক নির্ধারণে বিভিন্ন সামাজিক শ্রেণীর ভূমিকা এবং চাষীদের উপর এর ফলাফল আলোচনা করার প্রয়াস পাওয়া গেছে। তবে, মূল আলোচনায় যাবার আগে নীলকর ও নীলচাষী কারা ছিল সে বিষয়ে সংক্ষেপে বলে নেওয়া দরকার।

আমরা দেখেছি, প্রথম ইংরেজ নীলকর ক্যারেল ব্রুম নীলের ব্যবসা করে অত্যন্ত সময়ে বিপুল ঐশ্বর্যের অধিকারী হয়েছিলেন।^১ তার এই সমৃদ্ধি অন্যান্য ইউরোপীয়দের নীল চাষে প্রভাবিত করে। বাংলায় নীল চাষ আরম্ভের সঙ্গে সঙ্গে অনেক ইউরোপীয় নাগরিক এই ব্যবসায় জড়িয়ে পড়ে। এদের প্রধানত দু'ভাগে বিভক্ত করা চলে। যথা কোম্পানির কর্মচারী এবং বসতি স্থাপনকারী। কোম্পানির অধীনে চাকরি করার জন্য অনেক ইউরোপীয় নাগরিক এদেশে এসেছিল। এরা নীলের ব্যবসায় এগিয়ে আসে। অবশ্য প্রথম দিকে কোম্পানি কর্মচারীদের ব্যক্তিগত ব্যবসা করার অধিকার না দেওয়ায় তারা নীলের ব্যবসায় যোগ দিতে পারতো না। অনেক কর্মচারী কোম্পানির চাকরি ত্যাগ করে নীলের কারবারে যোগদান করে। পরবর্তী কালে কোম্পানি কর্মচারীদের নীলের ব্যবসা করার অনুমতি দেয়। এতে তারা উৎসাহিত হয় এবং নীলের ব্যবসাতে কোম্পানি কর্মচারীর সংখ্যা বৃদ্ধি পায়। উনিশ শতকের প্রথমার্ধে বাংলার বেশিরভাগ নীল কুঠির মালিক ছিল কোম্পানির কর্মচারী।^২ উপনিবেশিক সরকার ভারতে ইংরেজদের বসতি স্থাপনে উৎসাহী ছিল। এর কারণ, ভারতীয় উপনিবেশে ইংরেজদের সংখ্যা বৃদ্ধির মাধ্যমে নিরাপত্তা লাভ করা। এক্ষেত্রে উল্লেখযোগ্য ভূমিকা রাখে বাংলার নীল চাষ ব্যবস্থা। উনিশ শতকের প্রথমার্ধ পর্যন্ত নীলের ব্যবসা ছিল কোম্পানির একচেটিয়া বাণিজ্যিকারের বাইরের একমাত্র ব্যবসা।^৩ ফলে এ ব্যবসাকে কেন্দ্র করে এদেশে ইংরেজ বসতি স্থাপনকারীদের আগমন ঘটে। ১৭৭৮ খ্রিষ্টাব্দে কোম্পানি ৮/১০ জন নীলকরকে পশ্চিম ভারতীয় দ্বীপপুঞ্জ থেকে এনে বাংলার বিভিন্ন জেলায় বসিয়ে দেয়। এভাবে নীল চাষে কোম্পানি কর্মচারীদের পাশাপাশি নতুন বসতি স্থাপনকারী ইংরেজদের আগমন ঘটে। বাংলায় ইংরেজ নীলকরের সংখ্যা বৃদ্ধি পায়। বস্তুত, বাংলার বেশিরভাগ নীলকর ছিল ইংরেজ। অবশ্য দেশীয় জমিদাররাও নীল চাষে অগ্রসর হয়। তবে, তারা প্রশাসন ও সরাকরের পক্ষ থেকে সহযোগিতা না পাওয়ায় তেমন সুবিধা করতে পারেনি।^৪ ফলে কিছু দেশীয় জমিদারের অস্তিত্ব বর্তমান থাকলেও নীলকরদের

১. চতুর্থ অধ্যায় দেখুন।
২. *Calcutta Review*, December 1858, Vol. XXXI, p. 337.
৩. *Ibid.*
৪. নীলের ব্যবসায় দেশীয়দের অংশগ্রহণ ছিল নগণ্য। দেখুন, BPP, 1831-32, Vol. XII, p. 38.

বেশিরভাগই ছিল ইংরেজ। যশোর জেলার ক্ষেত্রেও একই কথা বলা চলে। এ জেলায়ও বেশিরভাগ নীলকর ছিল ইংরেজ। তাদের কতজন বসতি স্থাপনকারী এবং কতজন কোম্পানির কর্মচারী ছিল, তা বলা দুষ্কর। জেলায় নীলকুঠি স্থাপনকারী প্রথম ইংরেজ নীলকর জেমস বন্ড ছিলেন একজন বসতি স্থাপনকারী। বিভিন্ন উৎসে তাকে 'a free merchant' বলে উল্লেখ করা হয়েছে।^৫ জেলার অন্য একজন নীলকর এন্ডারসন ছিলেন কোম্পানির একজন ডাক্তার (সিভিল সার্জন)।^৬ তিনি বারান্দি এবং নীলগঞ্জে কুঠি স্থাপন করেছিলেন। অতএব বলা চলে, যশোরের নীলকরদের মধ্যে বসতি স্থাপনকারী এবং কোম্পানির কর্মচারী উভয়ই ছিল।

নীলচাষী কারা ছিল? সাধারণ কৃষক নীল চাষ করত। তাদের রায়ত বলা হতো। শতকরা ৮৫% ভাগ নীল উৎপন্ন করত এ রায়তেরা। এদের উপরে ছিল জমিদার, পত্তনিদার, ইজারাদার প্রভৃতি মধ্য স্বত্বভোগী। রায়তদের উপর তাদের ব্যাপক প্রভাব ছিল।^৭ জমিতে রায়তের ভোগ-দখলের অধিকার ছিল বহুদিনের ঐতিহ্য। তারা জমিতে ইচ্ছামতো যে কোনো ফসল চাষ করতে পারত। ইতোপূর্বে তাদের এই অধিকারে কেউ হস্তক্ষেপ করেনি। নীল চাষ আরম্ভ হবার পর তাদের এ অধিকার খর্ব হয়। নীলকররা তাদের নীল চাষ করতে বাধ্য করে।

৫.১ নীল চাষে নীলকর ও চাষীর লাভক্ষতি

নীল চাষে নীলকর ও চাষীর লাভ লোসকান কেমন হতো, তা খতিয়ে দেখা দরকার। একবিঘা জমিতে নীল চাষ করতে কত খরচ হতো সে বিষয়ে মতবিরোধ রয়েছে। একজন নীলকরের ভাষ্য মোতাবেক, একবিঘা জমিতে নীল চাষ করতে খরচ হতো ৩ রুপির মতো।^৮ প্রতি বাড়িল নীল গাছের জন্য ৬ পেন্স থেকে ১ শিলিং পর্যন্ত প্রদান করা হতো।^৯ এই মত গ্রহণ করা হলে নীলের দাম বাবদ কোনো কোনো সময়ে চাষীদের অল্প কিছু অর্থ পাবার কথা। নিচের সারণিতে এক বিঘা জমিতে 'নিজ' পদ্ধতিতে নীল চাষের খরচ দেখানো হল।

সারণি : ৫.১ : ১ বিঘা জমিতে নীল চাষে নীলকরের খরচ

খরচ	রুপি	আনা	পাই
চাষ বাবদ খরচ	১	৪	০
নিড়ানী বাবদ খরচ	০	১৪	০
কাটা বাবদ খরচ	০	১০	০
মোট খরচ	২	১২	০

উৎস: Ramshunker Sen, *Report on the Agricultural Statistics of Jessore*, Pt. I (Calcutta: Bengal Secretariat Press, 1873), p. 14.

৫. J. Westland, *op.cit.* p. 135.
৬. *Ibid.*
৭. রায়ার বিক্রি, 'নীল বিদ্রোহ' সিরাজুল ইসলাম (সম্পাদ), *বাংলাদেশের ইতিহাস*, ১৭০৪-১৯৭১, প্রথম খণ্ড। (ঢাকা: ১৯৯৩), পৃ. ২৫২।
৮. W.W. Hunter, *A Statistical Account*, *op.cit.*, Vol. II, p. 253.
৯. *Ibid.*

উপরের সারণিতে দেখা যায় প্রতি বিঘায় নীল চাষ বাবদ খরচ হতো ৩ রূপির মতো। মনে রাখা দরকার যে একজন নীলকর 'নিজ' আবাদে যে খরচ করতো এখানে সেই হিসেব দেওয়া হয়েছে। রায়তি চাষের ক্ষেত্রে এর সঙ্গে খাজনা, কুঠিতে পৌছানোর জন্য গাড়ি বা নৌকা ভাড়া এবং বীজের দাম যোগ হতো। সেই সঙ্গে আরো যোগ হতো চুক্তিপত্রের স্ট্যাম্পের দাম ও আমলাদের ঘুস।^{১০} এ ছাড়া ছিল গবাদি পশু ছাড়ানোর দস্তুরি, যা কোনো হিসেবে আসতো না। নীলের ক্ষেতে প্রবেশকারী গরু কুঠিতে নিয়ে যাবার পর তা শুধুমাত্র নগদ জরিমানার ভিত্তিতে ফেরত দেওয়া হতো। ফলে চাষীর হিসেবের খাতায় তা উঠতো না।^{১১} নীলচাষে নীলকরের চেয়ে চাষীর খরচ হতো বেশি। এক বিঘা জমিতে নীল চাষে রায়তের খরচ হতো নিম্ন রূপ।

সারণি : ৫.২ : ১ বিঘা জমিতে নীল চাষে চাষীর খরচ

খরচ	রূপি	আনা	পাই
খাজনা	১	৫	৯
চাষ বাবদ (প্রত্যেক বিঘায় ৮টি করে লাঙ্গল লাগত, প্রত্যেক লাঙ্গলের দাম ছিল ২ আনা ৬ পাই)	১	৪	০
বীজ (প্রত্যেক বিঘায় ৪ থেকে ৫ সের)	০	৪	০
নিড়ানী	০	১৪	০
নীল কাটা (১ আনা করে)	০	১০	০
দলিল (চুক্তির জন্য)	০	২	০
পরিবহন	০	৪	০
মোট	৪	১১	৯

বি.দ্র : রামশংকর সেন নীল চাষের খরচ দেখিয়েছেন ৪ রূপি ৫ আনা ৯ পাই। তিনি তাঁর হিসেবে দলিল ও পরিবহন খরচ দেখাননি। এই দু'টির খরচও চাষীকে বহন করতে হতো। দলিল খরচের সম্পূর্ণ এবং পরিবহন খরচের ১/৫ অংশ চাষীকে দিতে হতো।

উৎস : Ramshunker Sen, *Report on the Agricultural Statistics of Jessore*, Pt. I (Calcutta: Bengal Secretariat Press, 1973), p.14; Blair B. Kling, *The Blue Mutiny: The Indigo Disturbances in Bengal*, (Philadelphia: University of Pennsylvania Press, 1966), p. 36.

এক বিঘা জমিতে নীল চাষের পর নীল গাছের দাম বাবদ চাষী পেত ২ থেকে ৩ রূপি। বিঘা প্রতি গড়ে ৮ থেকে ১০ বাস্তিল নীলগাছ জন্মাতো।^{১২} রামশংকর সেনও একই মত

১০. চাষীদের প্রদত্ত অর্থ থেকে কুঠির আমলারা ঘুস নিতো। বেশিরভাগ ক্ষেত্রে প্রতি রূপিতে ২ আনা করে ঘুস নেয়া হতো। দেখুন, Letter From J. Cockburn, Esq. to Lord H.U. Brown, Esq., Under-Secretary to the Government of Bengal (dated the 31st December 1859), SRGB Indigo, Pt. I, p. 234; আরো দেখুন *Calcutta Review*, January-December 1847, Vol. VII, p. 210.

১১. Blair B. Kling, *op.cit.* p. 36.

১২. Letter From J. Cockburn, Esq. to Lord H.U. Brown, Esq., Under-Secretary to the Government of Bengal (dated the 31st December 1859), SRGB Indigo, Pt. I, p. 235; *Calcutta Review*, January-December 1847, Vol. VII, p. 210.

দিয়েছেন। তাঁর মতে এক বিঘা জমিতে খুব ভালো ফলন হলে ১২ বাস্তিল নীল গাছ জন্মাতো। রূপিতে ৪ বাস্তিল ছিল সর্বোচ্চ দাম।^{১৩} এই হিসেবে চাষী প্রতি বিঘায় নীলের দাম বাবদ পেতো ৩ রূপি।^{১৪} বাস্তবে বেশিরভাগ ক্ষেত্রে চাষীর প্রাপ্তি ছিল ২ রূপি বা তারও কম। ফলে নীল চাষে বিঘা প্রতি সরাসরি ক্ষতি হতো ২ থেকে ৩ রূপি। এছাড়া প্রাকৃতিক দুর্যোগ বা অন্য কোনো কারণে নীলের ক্ষতি হলে তার দায়িত্বভার সরাসরি চাষীকে বহন করতে হতো।^{১৫} সেই কারণে যশোর জেলার ডাকাতি বিষয়ক ডিপুটি ম্যাজিস্ট্রেট (প্রাক্তন নীলকর) জে. ককবার্ন স্বীকার করেছেন "No ryot, I am certain (by honest means) yet made a profit by cultivating Indigo under the present system."^{১৬}

চাষীর শুধুমাত্র এই ক্ষতিটুকুই যে হতো, তা নয়। এটুকু ছিল তার প্রত্যক্ষ ক্ষতি। পরোক্ষভাবে তার ক্ষতি হতো আরো অনেক বেশি। নীলকররা নীল চাষের জন্য চাষীর ভালো জমিগুলো নির্ধারণ করতো। ধান বা অন্য কোনো ফসল ফলানোর জন্য চাষী যে জমি প্রস্তুত করেছিল এক্ষেত্রে সে জমিটি কেড়ে নেওয়া হতো। ধান ও অন্য ফসল চাষ করতে পারলে চাষীর যে খরচ হতো, তা নিচের সারণিতে দেখানো হলো।

সারণি ৫.৩ : ১ বিঘা জমিতে ধান চাষে চাষীর খরচ

খরচ	রূপি	আনা	পাই
খাজনা (প্রতি বিঘায়)	১	৫	৯
চাষ	১	৪	০
মই দেওয়া	০	৪	০
জমি প্রস্তুত বাবদ (২ জন মজুর)	০	৫	০
নিড়ানী (১২ জন, জন প্রতি ২ আনা)	১	৮	০
মাড়ানো	০	৬	০
ঝাড়া	০	৩	০
মোট	৫	৩	৯

বি.দ্র : রামশংকর সেনের প্রদত্ত হিসেব থেকে সরিষা ও কালাই চাষ বাবদ খরচ বাদ দিয়ে হিসেব করা হয়েছে।

উৎস : Ramshunker Sen, *Report on the Agricultural Statistics of Jessore*, Pt. I, (Calcutta: Printed at the Bengal Secretariat Press. 1873), p. 45.

প্রতি বিঘায় গড়ে ১৫ মণ ধান হতো।^{১৭} এ পরিমাণ ধানের দাম ছিল ৭ রূপি ৮ আনা। এছাড়া ধান চাষের জন্য সময় লাগত মাত্র ৩ মাস। ফলে বছরের অবশিষ্ট সময় সেই

১৩. *Calcutta Review*, January-December 1847, Vol. VII, p. 206.

১৪. Ramshunker Sen, *op.cit.* p. 15.

১৫. *Calcutta Review*, January-December 1847, Vol. VII, p. 206.

১৬. Letter From J. Cockburn, Esq. to Lord H.U. Brown, Esq. Under-Secretary to the Government of Bengal (dated the 31st December 1859), SRGB Indigo, Pt. I, p. 236; *Calcutta Review*, January-December 1847, Vol. VII, p. 210.

১৭. Ramshunker Sen, *op.cit.* p. 45.

জমিতে অন্য ফসল চাষ করা যেতো। এসব জমিতে আনায়াসে কলাই এবং সরিষা আবাদ করা যেতো। এ বাবদ চাষীকে ৬ আনা করে ১২ আনার বেশি খরচ করতে হতো না।^{১৮} বিঘা প্রতি সরিষা পাওয়া যেতো ১ মণ। এর দাম ৩ রূপি। এছাড়া কলাই পাওয়া যেতো ৪ মণ, যার দাম ১ রূপি ৮ আনা।^{১৯} এভাবে একজন চাষী ১২ রূপি আয় করতে পারতো। এর মধ্যে তার খরচ ছিল ৫ রূপি ১৫ আনা ৯ পাই। ফলে তার লাভ হতো ৬ রূপি ৩ পাই। তাই, নীল চাষ করায় একজন চাষীর বিঘা প্রতি ক্ষতি হতো ৮ থেকে ৯ রূপি।^{২০}

নীল চাষ চাষীর জন্য যতোটা ক্ষতির কারণ ছিল নীলকরের জন্য তা ছিল ততোটাই লাভজনক। এ সময়ে ইউরোপের বাজারে নীলের দাম নিচের সারণিতে দেওয়া হলো।

সারণি-৫.৪ : ইস্ট ইন্ডিয়া কোম্পানির নীলের দাম, ১৮১৯-২০ থেকে ১৮২৯-৩০ খ্রি.

কেনার বছর	বিক্রির বছর	গড় বিক্রয় মূল্য (প্রতি পাউন্ড)		
		পাউন্ড	সেন্ট	পেন্স
১৮১৯-২০	১৮২০	--	৭	--
১৮২০-২১	১৮২১	কেনা হয়নি		
১৮২১-২২	১৮২২	--	১০	৯ $\frac{৩}{৪}$
১৮২২-২৩	১৮২৩	--	১০	২ $\frac{৩}{৪}$
১৮২৩-২৪	১৮২৪	--	৯	৪
১৮২৪-২৫	১৮২৫	--	১১	৫ $\frac{৩}{৪}$
১৮২৫-২৬	১৮২৬	--	৯	১ $\frac{১}{২}$
১৮২৬-২৭	১৮২৭	--	৮	৯
১৮২৭-২৮	১৮২৮	--	৭	৫
১৮২৮-২৯	১৮২৯	--	৫	৩ $\frac{১}{২}$
১৮২৯-৩০	১৮৩০	--	৪	৩ $\frac{৩}{৪}$

উৎস : *British Parliamentary Papers*, 1831-32, Vol. VIII, p. 536.

১৮. *Ibid.*

১৯. *Ibid.*

২০. সেই কারণে ব্রিটিশ পার্লামেন্টারি সিলেক্ট কমিটির সদস্য আর ডি ম্যাকলুস তাঁর সাক্ষ্য বলেন, নীল চাষ করে চাষীর নুন-ভাতও জুটতো না। দেখুন, BPP. 1859, Vol. IV, p. 90.

ইস্ট ইন্ডিয়া কোম্পানি নীল সংগ্রহ করতো কোলকাতা থেকে। বিভিন্ন নীলকর দালালের মাধ্যমে কোম্পানিকে নীল সরবরাহ করতো। নিচের সারণিতে ১৮২২-৩১ খ্রিষ্টাব্দ পর্যন্ত কোলকাতার বাজারে নীলের দাম প্রদর্শিত হলো।

সারণি-৫.৫ : কোলকাতার বাজারে নীলের দাম, ১৮২২-২৩ থেকে ১৮৩০-৩১ খ্রি.

বছর	প্রতিমণ নীলের দাম (রূপি)
১৮২২-২৩	২৬৮
১৮২৩-২৪	২৭৫
১৮২৪-২৫	২২১
১৮২৫-২৬	২৩৫
১৮২৬-২৭	২৬৬
১৮২৭-২৮	২৩৯
১৮২৮-২৯	২৭২
১৮২৯-৩০	২২১
১৮৩০-৩১	১৭৮

উৎস : *British Parliamentary Papers*, 1831-32, Vol. X, Pt. II, p. 536.

কোলকাতার বাজারে ১ মণ ভালো নীলের দাম ছিল ২৩০ রূপি মতো। অবশ্য এটি ইউরোপীয় নীলকরদের তৈরি নীলের দাম। আমরা আগেই দেখেছি যে, ইউরোপীয়দের তৈরি নীল ছিল উৎকৃষ্ট মানের। দেশীয়দের তৈরি নীল ততো ভালো ছিল না। এই নীলের দাম ছিল প্রতি মণ ১০৯ রূপি।^{২১} আমরা ইউরোপীয়দের তৈরি নীলের কথাই আলোচনা করছি। এছাড়া যশোর জেলার নীল ছিল উৎকৃষ্ট মানের।^{২২} তাই এখানে প্রথম দামটি বিবেচনা করাই যৌক্তিক হবে। ১ বিঘা জমিতে ১০ থেকে ১২ বাউল নীলগাছ উৎপন্ন হতো। এই পরিমাণ নীলগাছের দাম ছিল ২ রূপি ৮ আনা থেকে ৩ রূপি। কারণ ৪ বাউল নীলগাছের জন্য ১ রূপি দাম দেওয়া হতো।^{২৩} ১,০০০ বাউল নীল গাছ থেকে নীল পাওয়া যেত ৫ থেকে ৭ মন।^{২৪} যদিও বেশিরভাগ নীলকর দাবি করেন যে, বিঘা প্রতি ৪ সের নীল উৎপন্ন হতো।^{২৫} কিন্তু ১০ বা ১২ বাউল নীলগাছ থেকে ২ সের মতো নীল পাবার কথা। মনে করা চলে, চাষীকে লাভবান দেখিয়ে নীল চাষের বৈধতা প্রতিষ্ঠিত করার ইচ্ছায় নীলকররা নীলের পরিমাণ বাড়িয়ে বলে। যাহোক, ২ সের নীলের জন্য নীলকর চাষীকে দিতো মাত্র ২ রূপি ৮ আনা। উৎপাদন

২১. Ranashunker Sen, *op.cit.*, p. 13.

২২. RIC para 72, p. 21: সতীশচন্দ্র মিত্র, *পূর্বোক্ত*, ২য় খণ্ড পৃ. ৭৬৯।

২৩. কৃষ্ণনগরে (নদীয়ায়) রূপিতে ৬ বাউল এবং যশোরে রূপিতে ৪ বাউল হিসেবে নীলগাছের দাম দেওয়া রেওয়াজে পরিণত হয়েছিল। দেখুন, RIC Q 3391; আরো দেখুন, *Calcutta Review*, January-December 1847. Vol. VII, p. 206.

২৪. RIC Appendix I.

২৫. *Ibid.*

ব্যয় বাবদ খরচ হতো ১ রূপিও কম।^{২৬} অর্থাৎ ২ সের নীল উৎপাদন করতে একজন নীলকরের ৩ রূপি ৮ আনার বেশি খরচ হতো না। ২৩০ রূপি মণ হিসেবে ২ সের নীলের দাম ছিল ১১ রূপি ৮ আনা। ফলে, ৩ রূপি ৮ আনা খাটিয়ে নীলকর আয় করতো ১১ রূপি ৮ আনা। এক্ষেত্রে তার লাভ হতো ৮ রূপি। এত বেশি লাভ হতো বলেই অত্যন্ত সময়ে নীলকররা ঐশ্বর্যের অধিকারী হতে পারতো। অধিকাংশ ঐতিহাসিক এবিষয়ে একমত যে, নীল উৎপাদনের কারবার ছিল একটি অত্যন্ত লাভজনক ব্যবসা।^{২৭}

৫.২ নীলকর ও নীলচাষীর সম্পর্ক

আগেই বলা হয়েছে যে, নীল কুঠির স্বত্বাধিকারের জমি ও অন্যের স্বত্বাধিকারের জমিতে নীল চাষ করা হতো। এসব জমিকে যথাক্রমে 'এলাকা' এবং 'বে-এলাকা' বলা হতো। এই দু'রকমের জমিতেই দু'টি স্বতন্ত্র ব্যবস্থায় নীল চাষ হতো। তা হলো 'নিজ' এবং 'দাদনি'।^{২৮} 'নিজ' চাষ সাধারণত 'এলাকা' জমিতে করা হতো। অধিকাংশ ক্ষেত্রে 'নিজ' ব্যবস্থায় নীল চাষ করা হতো চরে। 'দাদনি' চাষ করা হতো 'এলাকা' এবং 'বে-এলাকা' উভয় জমিতেই। 'নিজ' আবাদে নীলকর নিজের মজুর, লাঙ্গল ও বীজ দিয়ে নীল চাষ করতো। মজুর হিসেবে বীরভূম, মানভূম, বাঁকুড়া প্রভৃতি 'এলাকা' থেকে বুনো কুলিদের আনা হতো।^{২৯} বেশিরভাগ ক্ষেত্রে তারা সপরিবারে আসতো। কুঠির পার্শ্ববর্তী স্থানে নীলকরের জায়গাতেই এরা বসবাস করে নীল কুঠির কাজ করতো।^{৩০} পরবর্তী কালে এদের একাংশ আর স্বদেশে প্রত্যাবর্তন করেনি। ফলে, যশোর জেলায় কুঠি ছিল এমন অনেক জায়গাতেই বুনো কুলিদের বসবাস লক্ষ করা যায়।^{৩১} এছাড়া 'নিজ' আবাদের জন্য কুঠিতে লাঙ্গল ও বলদ রাখা হতো।^{৩২} নীল চাষ করার জন্য নীলকরদের উল্লেখিত বুনো কুলি এবং লাঙ্গল পর্যাপ্ত ছিল না। বস্তুত, নীল উৎপাদন ও প্রক্রিয়াজাতকরণের মধ্যেই কুঠির নিয়মিত মজুরদের কার্যক্রম সীমাবদ্ধ থাকতো। নীলকর তার 'নিজ' চাষের জন্য অস্থায়ী মজুর ও লাঙ্গলের উপর নির্ভর করতো। এর কারণ বুনো কুলিদের এদেশে চাষাবাদে অদক্ষতা। এছাড়া বুনোকুলিদের আনাও ছিল ব্যয় সাপেক্ষ। আর্থিকভাবে প্রতারণা করা হলে পরবর্তী মৌসুমে এরা আর আসতো না। অন্যদিকে, স্থানীয় চাষীদের ঠিকানো ছিল সহজ। নীল কমিশনের তদন্তে এটি পরিষ্কার হয়ে গিয়েছিল যে, নীলকররা প্রচলিত হারের চেয়ে অনেক কম মজুরি দিতো।^{৩৩}

২৬. প্রমোদরঞ্জন সেনগুপ্ত, পূর্বোক্ত, পৃ. ৪৩।

২৭. George Watt, *Dictionary of the Economic Products of India*, Vol. IV. (Calcutta: 1883), p. 428.

২৮. *Calcutta Review*, January-June 1847, Vol. VII, p. 206.

২৯. RIC Q 1940; সতীশচন্দ্র মিত্র, পূর্বোক্ত, ২য় খণ্ড, পৃ. ৭৭৮; Colsworthy Grant, *Rural Life in Bengal*. (London: 1860), pp. 114-115 উদ্ধৃত, Blair B. Kling, *op.cit.* p. 29.

৩০. সতীশচন্দ্র মিত্র, পূর্বোক্ত, ২য় খণ্ড, পৃ. ৭৭৮।

৩১. ঐ।

৩২. RIC Appendix 1.

৩৩. RIC Q 870; আরো দেখুন, *Calcutta Review*, March 1861, No LXXI., Vol. XXXVI, p. 35; *Calcutta Review*, January-December 1847, Vol. VII, p. 206.

✓ এমনকি ১৮৫০-এর দশকে মুদ্রাস্ফীতি ও রেলপথ নির্মাণ কার্যক্রমের জন্য মজুরি বৃদ্ধি পেলেও নীলকররা মজুরি বৃদ্ধি করেনি। এছাড়া তারা চাষীদের লাঙ্গলের দামও কম দিতো।^{৩৪} বাজার দর মোতাবেক ১ রূপিতে ৮টি লাঙ্গল পাওয়া যেতো। নীলকররা ১৬টি লাঙ্গলের দাম দিতো ১ রূপি।^{৩৫} নীলকরদের ক্ষেত্রে মজুর ও লাঙ্গল দেবার বিষয়ে চাষীদের কোনো স্বাধীনতা ছিল না।^{৩৬} এক্ষেত্রে চাষীদের বাধ্য করা হতো। লাঙ্গল বা মজুর দিতে অস্বীকার করলে নীলকর তার লাঠিয়ালের মাধ্যমে বল প্রয়োগ করতো। ফলে দ্বন্দ্ব দেখা দিতো।

'নিজ' আবাদের চেয়ে 'দাদনি' চাষ অনেক বেশি লাভজনক হওয়ায় নীলকররা দাদনি চাষ বৃদ্ধি করতে যত্নবান ছিল।^{৩৭} ১৮৬০ খ্রিষ্টাব্দে নীল কমিশনের সামনে যশোর জেলার সাক্ষ্য দানকারী নীলকরদের প্রত্যেকের 'নিজ' আবাদের চেয়ে 'দাদনি' চাষ ছিল বেশি। এদের কারো কারো তিন-চতুর্থাংশ এবং কারো কারো সম্পূর্ণ নীলই 'দাদনি' চাষে উৎপন্ন হতো।^{৩৮} 'দাদনি' ব্যবস্থায় নীল চাষের জন্য নীলকররা চাষীকে অগ্রিম অর্থ প্রদান করতো। এ অর্থকে বলা হতো দাদন। দাদন প্রদানের মাধ্যমে এই চাষ করা হতো বলে একে 'দাদনি' চাষ বলা হতো। যশোর জেলায় দাদনের পরিমাণ ছিল বিঘা প্রতি ২ রূপি।^{৩৯} এই ২ রূপির বিনিময়ে চাষীকে নিজের জমিতে শ্রম ও লাঙ্গল দিয়ে কুঠির জন্য নীল চাষ করতে হতো। নীল বোনা থেকে কাটা পর্যন্ত সমস্ত দায়িত্ব ছিল দাদন গ্রহণকারী চাষীর।^{৪০} চাষীকে আবাদ শেষে নীলগাছ কেটে তা কুঠিতে পৌঁছে দিতে হতো।

✓ আগেই উল্লেখ করা হয়েছে যে, দাদনগ্রাহী চাষীর জন্য নীল চাষ ছিল ক্ষতিকর। যে চাষী একবার দাদন গ্রহণ করতো, সেই কুঠির ঋণের জালে আবদ্ধ হয়ে পড়তো। দাদন সম্পর্কে শিবনাথ শাস্ত্রী বলেন:

দাদনের অর্থ কৃষকদিগকে অগ্রিম অর্থ দেওয়া। দরিদ্র কৃষকগণ অগ্রিম অর্থ পাইলে আরও অনেক কাজে লাগাইতে পারিবে বলিয়া দাদন লইত; তৎপরে তাহারা নীলকরের দাসরূপে পরিণত হইত। নীলকরগণ জোর করিয়া উৎকৃষ্ট জমিতে নীল বুনাইয়া লইতেন; তাহাদের আদেশানুযারে কার্য্য করিতে না চাহিলে প্রহার, কয়েদ, গৃহদাহ প্রভৃতি নৃশংস অত্যাচার করিতেন; এবং অনেক স্থলে জমিদার হইয়া বসিয়া অব্যাহত প্রজাদিগকে একেবারে ধনেপ্রাণে সারা করিতেন।^{৪১}

৩৪. *Calcutta Review*, March 1861, No. LXXI, Vol. XXXVI, p. 35.

৩৫. RIC Q 156; ফোর্বস নামক জনৈক নীলকর পার্লামেন্টারি সিলেক্ট কমিটির নিকট স্বীকার করেন যে, তারা চাষীদের নিকট থেকে রূপিতে ১৪টি লাঙ্গল ক্রয় করতো। দেখুন, BPP, 1859, Vol. IV, p. 195.

৩৬. *Calcutta Review*, March 1861, No. LXXI, Vol. XXXVI, p. 36.

৩৭. BPP, 1852-53, Vol. XXVII, p. 481.

৩৮. RIC Appendix 1; আরো দেখুন, *Calcutta Review*, March 1861, No. LXXI, Vol. XXXVI, pp. 33-34.

৩৯. RIC Q 3832; আরো দেখুন, *Calcutta Review*, March 1861, No. LXXI, Vol. XXXVI, p. 34.

৪০. *Calcutta Review*, March 1847, Vol. VII, p. 206.

৪১. শিবনাথ শাস্ত্রী, রামতনু লাহিড়ী ও তৎকালীন বঙ্গ-সমাজ। (কলিকাতা: ১৯৮৩, চতুর্থ মুদ্রণ), পৃ. ১৯৯।

মনে রাখা দরকার, শিবনাথ শাস্ত্রী এক্ষেত্রে প্রত্যক্ষ জ্ঞানের অধিকারী ছিলেন।

অবশ্য, প্রথম দিকে গ্রামে বসবার সময় নীলকররা চাষীদের আস্থা অর্জনে নিষ্ঠাবান ছিল। এসময়ে তারা চাষীদের নিষ্কর ও পতিত জমিতে নীল চাষের প্রস্তাব দিতো এবং এক্ষেত্রে তাদের অগ্রিম অর্থ দিয়ে সহায়তা করতো।^{৪২} এভাবে নীল চাষের ক্ষেত্রে 'দাদনি' ব্যবস্থার প্রচলন হয়। অবশ্য বাংলায় 'দাদনি' ব্যবস্থা নতুন কিছু নয়। আগেও এদেশে 'দাদনি' ব্যবস্থা প্রচলিত ছিল। অনেক আগে থেকেই কোম্পানি এ ব্যবস্থার মাধ্যমে তাঁতিদের নিকট থেকে বস্ত্র ক্রয় করতো। যশোর জেলার বুড়ন ও সোনাবাড়িয়ায় একজন করে রেসিডেন্ট অবস্থান করতো। তারা জেলার তাঁতিদেরকে দাদন দিয়ে বাজার দর থেকে অনেক কম দামে কাপড় কিনতো। কোম্পানি ক্রয়কৃত এই কাপড় ইংল্যান্ডে রপ্তানি করতো।^{৪৩} জেলায় আগত ইউরোপীয় নীলকররা এই ব্যবস্থাটি সম্পর্কে অবগত ছিল। তারা 'দাদনি' ব্যবস্থাধীনে নীল চাষে অনুপ্রাণিত হয়েছিল সম্ভবত সেই কারণে।

দাদন প্রদানের পর নীলকররা চাষীদের নিকট থেকে কবুলিয়তে (চুক্তিপত্র) সই করে নিতো। বেশিরভাগ ক্ষেত্রে সাদা (অলিখিত) স্ট্যাম্পে তাদের বৃদ্ধাঙ্গুলির ছাপ নেওয়া হতো।^{৪৪} চুক্তির মেয়াদ ছিল ৩, ৫ বা ১০ বছর।^{৪৫} মনে রাখা দরকার, চুক্তি সম্পাদনের ক্ষেত্রে চাষীদের মতামতের তেমন কোনো গুরুত্ব ছিল না। প্রায় সব ক্ষেত্রেই নীলকররা জোর করে চাষীদের উপর চুক্তি চাপিয়ে দিতো।^{৪৬} সমসাময়িক কালের একটি দরখাস্তে চাষীরা বিষয়টির উপর গুরুত্ব আরোপ করে। দরখাস্তটিতে বলা হয়:

It (indigo cultivation) is a sort of trade, and a transaction between creditors and debtors, which must be done with the consent of both parties..... there is no such agreement that they [Indigo cultivators], during their life time, and their heirs would forsake their other professions and be exclusively employed in cultivating Indigo.

শুধুমাত্র চাষীরাই নয় ঔপনিবেশিক ভারতের বিচারকগণও এসম্পর্কে অনুরূপ মন্তব্য করেন। সদর দেওয়ানি আদালতের একজন জজ বলেন:

The contract formed with the ryot is sometimes not in writing, is frequently insufficiently defined, and is generally extremely unfavourable to the ryot, rendering him, in fact, a slave to the establishment with which he has once

৪২. প্রমোদরঞ্জন সেনগুপ্ত, পূর্বোক্ত, পৃ. ১৪।

৪৩. সতীশচন্দ্রমিত্র, পূর্বোক্ত, ২য় খণ্ড, পৃ. ৭৫৪।

৪৪. Letter From J. Cockburn, Esq., to Lord H. U. Brown, Esq., Under-Secretary to the Government of Bengal (dated the 31st December 1859), SRBG Indigo, pt. I, p. 233.

৪৫. RIC Appendix I: আরো দেখুন, Calcutta Review, March 1861, No. LXXI, Vol. XXXVI, p. 34.

৪৬. BPP, 1859, Vol. IV, p. 90.

৪৭. Proceeding of the Hon'ble Lt-Governor of Bengal: Judicial Department (এরপর থেকে PLGB Judicial হিসেবে উল্লেখ করা হবে) May 1860, No. 345.

engaged, and thereby preventing an open and fair competition to all, which could afford the only true and effectual remedy.^{৪৮}

জোরপূর্বক দাদন দিয়ে চুক্তি করা হতো বলে চাষীরা অনিচ্ছার সাথে তা গ্রহণ করতো। ফলে, এই চুক্তির স্বাভাবিক বাস্তবায়ন সম্ভব হতো না। নীলকররা বিভিন্ন অত্যাচারের মাধ্যমে চুক্তি মোতাবেক চাষীকে নীল চাষে বাধ্য করতো।^{৪৯}

নীল চাষের পর চাষী নীলগাছের যে দাম পেতো তাতে কখনই দাদান শোধ হতো না।^{৫০} এছাড়া কোনো চাষী অন্যভাবে বকেয়া শোধ দিয়ে নীল চাষ থেকে মুক্তি পেতে চাইলেও তাকে নানা অজুহাতে ঋণ শোধ দিতে দেওয়া হতো না।^{৫১} নীল কমিশনের সামনে একজন নীলকর একথাটি স্বীকার করে বলেছিলেন, "....that the ryot is not permitted to clean his account when he finds he cannot work to his won advantage."^{৫২} ফলে চাষীরা কুঠির নিকট চিরঋণী হয়ে থাকতো। যেতাই দিন যেতো এই ঋণ আরো বৃদ্ধি পেতো এবং এক সময় তা অপরিশোধযোগ্য ঋণে পরিণত হতো। ক্যালকাটা রিভিউ পত্রিকায় বিষয়টি সুন্দরভাবে ব্যাখ্যা করা হয়েছে। এতে মন্তব্য করা হয়েছে, "Like Sysiphus he [the engaged cultivator] succeeds in rolling the stone up the hill, only to see it roll down again. Like Ixion he is chained to a wheel which rolls and rolls and never drops. Like Tantalus he always seems to be within reach of his object and yet never secures it."^{৫৩} এভাবে চুক্তি স্থায়ী রূপ লাভ করতো। দাদনগ্রাহী চাষীর মৃত্যুর পর এই ঋণ তার উত্তরসূরিদের উপর বর্তাতো। অর্থাৎ নীলকররা চুক্তিটিকে বংশানুক্রমিক চুক্তিতে পরিণত করেছিল।^{৫৪} ফলে, পৌত্রকে পিতামহের, এবং কোনো কোনো ক্ষেত্রে প্রপৌত্রকে প্রপিতামহের চুক্তি মোতাবেক নীল চাষ অব্যাহত রাখতে হয়।^{৫৫} সমসাময়িক কালের বিখ্যাত নাট্যকার গিরিশচন্দ্র ঘোষ একটি পত্রিকায় এ প্রসঙ্গে লিখেন:

An unfortunate oldman in his dotage had fingered an indigo advance. Probably he was in distress and his mind wandered from cultivation. Probably the advance had been forced upon him by factory Gomasta not troubled with a peculiarly sensitive conscience. That oldman was thenceforward a doomed man. The brand of the vats was on his forehead and not death even could

৪৮. Pappers Relating to the Settlement of Europeans in India (1854), p. 117, উদ্ধৃত, Muhammad Mohar Ali, History of the Muslims of Bengal, Vol. II A (Riyadh: 1985), p. 127.

৪৯. RIC Q 582; Letter From J. Cockburn, Esq. to Lord H.U. Brown, Esq., Under-Secretary to the Government of Bengal (dated the 31st December 1859), SRBG Indigo, pt. I, p. 231; BPP, 1859, Vol. IV, p. 90.

৫০. Calcutta Review, January-December 1847, Vol. VII, p. 210.

৫১. Calcutta Review, June 1860, No LXVII, Vol. XXXIV, p. 241.

৫২. RIC Q 674.

৫৩. Calcutta Review, June 1860, No LXVIII, Vol. XXXIV, p. 241.

৫৪. RIC Q 303.

৫৫. Blair B. Kling, op.cit., p. 128.

release him from the fatal mark. It descended to his generation from father to son.

নীলকরদের অত্যাচারের আর একটি দিক হলো জোরপূর্বক ভূমি অধিগ্রহণ। দাদন প্রদানের পর নীলকর বল প্রয়োগ করে চাষীদের উৎকৃষ্ট জমি দখল করতো।^{৫৭} প্রমোদরঞ্জন সেনগুপ্তের ভাষায়, “.... নানা প্রলোভন দেখিয়ে নীলকর কৃষককে দাদনের চুক্তিতে বেঁধে ফেলত, এবং দু’চার বছর পরে, যখন কৃষক নীলকরদের দাদনের ফাঁদে একবার পা দিয়ে ফেলেছে, তখন সে তার উৎকৃষ্ট জমিতেও নীল চাষ করতে বাধ্য হতে লাগল।”^{৫৮} যশোর জেলার ক্ষেত্রেও একই কথা বলা চলে। ১৮৫৪ খ্রিষ্টাব্দে যশোর জেলার ম্যাজিস্ট্রেট জে. ডানবারের বিবরণ থেকে একথার প্রমাণ মেলে। তিনি লিখেন, “...they [planters] may yet make themselves very unpopular with their tenantry by always insisting on having their [cultivators] best lands for the growth of Indigo, and allowing less than a fairly remunerative price for the plant when cut and brought home.”^{৫৯} ভূমি অধিগ্রহণের এই প্রক্রিয়া শেষাবধি অব্যাহত থাকায় নীল চাষ, বিশেষ করে ‘দাদনি’ চাষ বৃদ্ধি পায়। বাংলার কোনো কোনো জেলার এক-তৃতীয়াংশ পর্যন্ত জমি নীল চাষের অধীনে আসে। নিম্ন-বাংলায় ৬৯,২৬,৭৩৩ বিঘা জমি নীল চাষের আওতায় আসে।^{৬০} যশোর জেলায় একইভাবে নীল চাষ বিস্তৃত হয়ে পড়ে। নীল কমিশনের ভাষ্য মোতাবেক ১৮৬০ খ্রিষ্টাব্দে এ জেলার উল্লেখযোগ্য অংশ জুড়ে নীল চাষ হতো।^{৬১} ফলে চাষীদের অন্য ফসল আবাদের জমি কমে যায়।

নীলকররা জমির মাপ নিয়ে চাষীদের সঙ্গে প্রতারণা করতো।^{৬২} বাংলার অন্যান্য জেলার মতো যশোর জেলায়ও ১ বিঘা জমির মাপ ছিল ১৪,০০০ বর্গ ফুট। নীলকররা এই মাপ মেনে চলতো না। তারা দাদনগ্রাহী চাষীদের নিকট ২১,৫১১ বর্গ ফুট সমান ১ বিঘা হিসেবে মেপে নিতো। অর্থাৎ নীলকরের ১ বিঘা প্রচলিত দেড় বিঘারও বেশি ছিল।^{৬৩} এছাড়া নীলগাছ কাটার পর কুঠিতে নিয়ে গেলে তা মাপের ক্ষেত্রেও কারচুপি করা হতো। সাধারণত ৬ হাত লম্বা চেইন দিয়ে নীলগাছ মাপা হতো। যতোগুলো নীলগাছ এই চেইন দিয়ে জড়ানো যেতো তা ছিল ১ বাউল।^{৬৪} অনেক সময় চেইনের মাপ ঠিক থাকতো না। এছাড়া ওজন করার সময় কুঠির

৫৬. Grish Chunder Ghose, “The Smash in the Indigo Districts,” *Mukerjee's Magazine*, March 1861; Manmathanath Ghose, *Selections from the Writings of Grish Chunder Ghose*. (Calcutta: 1912), p. 75.
 ৫৭. RIC Q 2542.
 ৫৮. প্রমোদরঞ্জন সেনগুপ্ত, *পূর্বোক্ত*, পৃ. ১৪।
 ৫৯. BPP, 1859, Vol. IV, p. 90; Extract from a Report from Mr. J. Dunbar on the District of Jessore (dated the 1st March 1854), SRGB *Indigo*, Pt. I, p. 16.
 ৬০. *Calcutta Review*, March 1860, No. LXVII, Vol. XXXIV, p. 117.
 ৬১. RIC Q 2552.
 ৬২. *Calcutta Review*, March 1860, No. LXVII, Vol. XXXIV, p. 127.
 ৬৩. RIC Q 2053.
 ৬৪. RIC Appendix 1; *Calcutta Review*, March 1861, No. LXXI, Vol. XXXVI, p. 37.

কর্মচারীরা নীলগাছের ডগার দিকে চেইন জড়িয়ে দিতো।^{৬৫} এতে চেইনে দ্বিগুণ বা তিনগুণ বেশি নীলগাছ ধরতো। যশোর জেলার এক জন চাষীর ভাষ্য মোতাবেক, নীলকর ডানলপের মীরগঞ্জ কুঠিতে নীলগাছ পৌছে দেবার পর ৩ বাউল নীল ১ বাউলে পরিণত হতো।^{৬৬} এতো কিছু পরও নীলগাছ বিক্রি করে চাষী সামান্য কিছু পেলে কুঠির কর্মচারীরা তাতে ভাগ বসাতো।^{৬৭} কুঠির কর্মচারীদের ঘুস গ্রহণ এসময়ে একটি রেওয়াজে পরিণত হয়েছিল। এই ঘুসের পরিমাণ ছিল রুপি প্রতি ২ আনা।^{৬৮} নীল কুঠির কর্মচারীরা ঘুস গ্রহণ করায় তাদের বেতন দ্বিগুণ, এমনকি কোনো কোনো ক্ষেত্রে তিনগুণ হয়ে যেতো।^{৬৯} এমতাবস্থায় নীল চাষ করে চাষীর ভাগ্যে শুধুমাত্র লোকসানই জুটতো।^{৭০} স্বাভাবিকভাবে প্রশ্ন উত্থাপন করা যেতে পারে যে, লোকসান হওয়া সত্ত্বেও চাষীরা কেন নীল চাষ করতো? উত্তরে বলা চলে নীলকরদের অত্যাচার ও নিপীড়ন থেকে রক্ষা পাবার জন্য।^{৭১} নীল চাষ না করলে তাদের অমানবিক অত্যাচারের শিকার হতে হতো। একজন ঐতিহাসিক লিখেছেন, “এই অত্যাচার যে কত প্রকারের ছিল তাহা বলিবার নহে। রাইয়তের খেজুর বন কাটিয়া উপড়াইয়া তাহাতে নীলের ক্ষেত করা হইত, পলাইত প্রজার ঘর ভাঙ্গিয়া ভিটার উপর নীলের চাষ করা হইত; এমনকি ঘর জ্বালাইয়া দিয়া উৎপাৎ করিয়া অবাধ্য রাইয়তকে তাড়াইয়া দেওয়া হইত। কুঠিতে কুঠিতে কয়েদ ঘর ছিল, চুক্তি (নীলের চুক্তি) ভঙ্গ করিলে রাইয়তদিগকে কুঠিতে ধরিয়া লইয়া নানা নবোদ্ভাবিত কৌশলে পীড়ন করিবার পর, কয়েদ করিয়া রাখা হইত।”^{৭২} ১৮৬০ খ্রিষ্টাব্দে নীল কমিশনের নিকট সাক্ষ্য প্রদান কালে একজন নীলকর এই অত্যাচারের কথা স্বীকার করেন। তাঁর মতে, গবাদি পশু হরণ করে, এমনকি ঘরবাড়ি জ্বালিয়ে দিয়ে চাষীদের নীল চাষে বাধ্য করা হতো।^{৭৩} যশোরের একটি ঘটনা এর সপক্ষে প্রমাণ দেয়। জেলার জয়েন্ট ম্যাজিস্ট্রেট একদিন একটি নীল কুঠির গুদামে কয়েক জন চাষীকে অপরূদ্ধ অবস্থায় দেখতে পান। পুলিশের সহায়তায় তিনি তাদের মুক্ত করেন। এ সংক্রান্ত মামলায় কুঠির লোকজনের সামান্য শাস্তি হয়েছিল।^{৭৪}

নীলকররা শুধুমাত্র অত্যাচারী ছিল তাই নয়, তাদের নৈতিক অবক্ষয়ও দেখা দিয়েছিল। তারা চাষীদের স্ত্রী ও কন্যাদের উপর অত্যাচার চালায়। কোনো কোনো ক্ষেত্রে তাদের সন্ত্রাস হানি করে। দু’টি কারণে নীলকররা এসব পদক্ষেপ গ্রহণ করে।

৬৫. *Calcutta Review*, March 1861, No. LXXI, Vol. XXXVI, p. 37.
 ৬৬. RIC Q 2543.
 ৬৭. BPP, 1859, Vol. IV, p. 90, *Calcutta Review*, January-June 1847, Vol. VII, p. 210.
 ৬৮. Letter From J. Cockburn, Esq., to Lord H.U. Brown, Esq., Under-Secretary to the Government of Bengal (dated the 31st December 1859), SRGB *Indigo*, Pt. I, p. 234.
 ৬৯. RIC Q 548.
 ৭০. সেই কারণে সিলেট কমিটির নিকট দেওয়া সাক্ষ্য ম্যান্ডলস নীল চাষ করে চাষীর নুন ভাতও জুটতো না বলে মন্তব্য করেন। দেখুন, BPP, 1859, Vol. IV, p. 90.
 ৭১. BPP, 1859, Vol. IV, p. 90.
 ৭২. সত্যচন্দ্র মিত্র, *পূর্বোক্ত*, ২য় খণ্ড, পৃ. ৭৮২-২৮৩।
 ৭৩. BPP, 1859, Vol. IV, p. 90; RIC Q 670-672.
 ৭৪. C.E. Buckland, *op.cit.*, Vol. 1, pp. 245-246.

প্রথমত, ক্রমাগত ক্ষতির মুখে নীল চাষ করা চাষীদের পক্ষে সম্ভব ছিল না। তারা এক্ষেত্রে অনীহা প্রদর্শন করে। ব্যাপক অত্যাচার করেও কোনো কোনো ক্ষেত্রে তাদের দিয়ে নীল চাষ করানো অসম্ভব হয়ে পড়ে। এরকম অবস্থায় নীলকররা চাষীদের ধর্মীয়, সামাজিক ও মানসিক দিক থেকে সম্ভ্রান্ত করে তোলার প্রচেষ্টায় লিপ্ত হয়। দ্বিতীয়ত, ক্ষমতা বৃদ্ধির পর নীলকর ও তাদের কর্মচারীরা চাষীদের স্ত্রী কন্যাদের প্রতি লোলুপ দৃষ্টি নিবদ্ধ করে। গ্রামাঞ্চলে প্রতীয়মান একমাত্র কর্তৃপক্ষ হিসেবে যেকোনো রকমের সিদ্ধান্ত বাস্তবায়ন করা নীলকর বা কুঠির কর্মচারীদের পক্ষে সম্ভব ছিল। অনৈতিক ইচ্ছা পূরণের জন্য তারা চাষীর স্ত্রী ও কন্যাকে ধরে আনতো। নীল কমিশনের কাছে সাক্ষ্য প্রদান কালে পাদরি রেভারেন্ড সি. বমভেটস নীলকরদের এরকম চারিত্রিক ক্রটির কথা উল্লেখ করেন। তাঁর সাক্ষ্য মোতাবেক কাঁচিকাটা কনসার্নের নীলকর আর্চিবল্ড হিলস হারামনি নামক এক সুন্দরী কৃষক কন্যাকে জোর করে কুঠিতে ধরে আনেন। তিনি তাকে রাত্রি দ্বিপ্রহর পর্যন্ত কুঠিতে আটক রাখেন। নীল কমিশনের নিকট ইউরোপীয় পাদরির এমন সাক্ষ্য প্রশাসনকে সচকিত করে তোলে। নদীয়া জেলার ম্যাজিস্ট্রেট হারসেল বিষয়টি তদন্ত করেন। তদন্তে ঘটনার সত্যতা প্রমাণিত হয়। সমসাময়িক কালের একটি সংবাদপত্রে লেখা হয়, “The story was told by Rev. C. Bomwetsch before the Indigo Commission. The magistrate (Herschel) said in his reply that the abduction seemed very clearly proved.”^{৭৫} এই ঘটনাটি ঘটেছিল নদীয়া জেলায়। যশোর জেলায়ও এরকম ঘটনা বিরল ছিল না। সেসময়ের পত্রিকা থেকে জানা যায় যে, যশোরের নীলকররা স্বামীদের অনুপস্থিতিতে ব্রাহ্মণ, কায়স্থ প্রভৃতি সমাজের উচ্চ শ্রেণীর মহিলাদের ধরে এনে নীলের ক্ষেতে কাজ করিয়ে নিতো। মেয়েদের গুদামে আটক রেখে তাদের উপর অত্যাচার চালাতো।^{৭৬} বিজলিয়া কুঠির নীলকর ওম্যান গ্রামের স্ত্রী লোকদের ধরে কুঠিতে নিয়ে গিয়ে অত্যাচার করতো।^{৭৭} একই পত্রিকায় যশোর জেলায় সংঘটিত এরকম একটি ঘটনার উল্লেখ আছে। ঘটনার বিবরণে দেখা যায় যে, হাজরাপুর কনসার্নের নীলকর ওয়েটস রামতনু অধিকারী নামক একজন চাষীর বাড়ি আক্রমণ করে। লাঠিয়ালদের আক্রমণের আগেই বাড়ির পুরুষরা ভয়ে পালিয়ে যায়। তবে, মহিলারা পালাতে পারেনি। লাঠিয়ালরা রামতনু অধিকারীর বাড়ি ধ্বংস করে দেয় এবং স্ত্রীলোকদের উঠানে নিয়ে এসে জনসমক্ষে তাদের বিবস্ত্র করে ফেলে। রামতনু ম্যাজিস্ট্রেট স্কিনারের^{৭৮} নিকট আবেদন জানিয়েও কোনো সুফল পাননি।^{৭৯} শুধুমাত্র নীলকররাই নয়, প্রশাসনও চাষীদের স্ত্রী-কন্যার প্রতি একইভাবে অত্যাচার আরম্ভ করে। নীলকরদের প্ররোচনায় পুলিশ একাজে লিপ্ত হয়। সমসাময়িক কালের সরকারি দলিলে এর সপক্ষে প্রমাণ মেলে। এতে উল্লেখ করা হয় যে, “The Darogahs who are deputed to the mofussil on false pretences, enter their (cultivators)

৭৫. সতীশচন্দ্র মিত্র, পূর্বোক্ত, ২য় খণ্ড, পৃ. ৭৮৪, পাদটীকা।

৭৬. *Hindoo Patriot*, August 22, 1860.

৭৭. *Ibid.*

৭৮. স্কিনার যশোর জেলার ম্যাজিস্ট্রেট ছিলেন।

৭৯. *Hindoo Patriot*, August 22, 1860.

houses, carry away their females, and subject them to great dishonor and hardship.”^{৮০}

প্রশাসনের নিকট থেকে চাষীরা স্ত্রী-কন্যার মানসম্মান রক্ষার নিশ্চয়তা তো পায়নি, বরং দারোগা পুলিশরা নীলকরদের সাথে এই অত্যাচারে মেতে উঠেছে। ফলে চাষীরা প্রতিরোধ ভিন্ন পরিব্রাণের আর কোনো পথ দেখতে পায়নি। নীলকরদের অপ্রতিরোধ্য ক্ষমতা ও অসহনীয় অত্যাচারের কারণে চাষীরা তাদের প্রতি ভীত-সম্ভ্রান্ত ছিল, সন্দেহ নাই। তাদের স্ত্রী ও কন্যাদের প্রতি এরকম আচরণে তারা অস্থির হয়ে পড়ে। রেভারেন্ড জেমস লঙ হরকরা পত্রিকায় এবিষয়ে বলতে গিয়ে মন্তব্য করেন, “The violation of their (cultivators) daughters will teach ryots how they complain of the Indigo Shaheb.”^{৮১} এই অত্যাচার থেকে রক্ষা পাবার জন্য তারা যেকোনো ব্যবস্থা নিতে রাজি ছিল। স্থানীয় কর্তৃপক্ষ নীলকরের প্রতি পক্ষপাতিত্ব করতো। সেই কারণে চাষীরা লেফটেন্যান্ট গভর্নরের নিকট আবেদন করে বলে, “If the Mofussil Authorities are determined to get Indigo cultivated for the Planters, they can do so in the Petitioners lands which are sown with paddy; but they should be prevented from destroying the religion and life of the Petitioners.”^{৮২} অবশ্য নীল কমিশন তদন্তকালে নীলকর কর্তৃক চাষীর স্ত্রী-কন্যাদের প্রতি উৎপীড়নের বিষয়ে তেমন কোনো প্রমাণ পায়নি। মান-সম্মানের দায়ে কোনো চাষী তার স্ত্রী বা কন্যার এরকম পরিণতির কথা স্বীকার করেনি। তৎকালীন বাংলার সামাজিক অবস্থা এই সত্য স্বীকার করার বা মেনে নেবার পক্ষে মোটেও অনুকূল ছিল না। এসব ক্ষেত্রে নিপীড়িত মহিলাদের সমাজে অস্পৃশ্য হওয়া ছাড়া কোনো উপায় ছিল না। তার অভিভাবককেও বিভিন্নভাবে নিগূহীত হতে হতো। এমতাবস্থায় কোনো চাষীই এর পক্ষে সাক্ষ্য দিতে রাজি ছিল না। সতীশচন্দ্র মিত্র লিখেছেন, “... এদেশীয় প্রজা মান ইজ্জতের ভয়ে ব্যাকুল হইয়াছিলেন। চরিত্রহীন কুঠিয়ালেরা নিম্নতম শ্রেণী হইতে যে স্ত্রীলোক সংগ্রহ করিত, তাহার প্রমাণাভব [sic.] ছিল না।”^{৮৩}

ঔপনিবেশিক বাংলায় নীলকরদের অত্যাচারের বিষয় সমসাময়িক পত্র-পত্রিকায় প্রকাশিত হয়। ‘সমাচার দর্পণ’ পত্রিকায় এ সম্পর্কে লিখা হয়, “মফঃস্বলে কোন কোন নীলকরেরা প্রজার উপর দৌরাড্য করেন তাহার বিশেষ এই যে প্রজা নীলের দাদন না নেয় তাহার প্রতি ক্রোধ করিয়া থাকেন ও খালাসীদিগকে কহিয়া রাখেন যে ঐ সকল প্রজার গরু নীলের নিকট আইলে সে গরু ধরিয়া কুঠিতে আনিবা।”^{৮৪} এই অত্যাচারের বিষয়টি সংবাদ প্রভাকর পত্রিকায়ও প্রকাশিত হয়। এতে লিখা হয়, “ইংরেজ

৮০. “Abstract Translation of a Petition from Certain Inhabitants of Zillas Nuddea and Jessore”, PLGB Judicial, May 1860.

৮১. সতীশচন্দ্র মিত্র, পূর্বোক্ত, ২য় খণ্ড, পৃ. ৭৮৪, পাদটীকা।

৮২. “Abstract Translation of a Petition from Certain Inhabitants of Zillas Nuddea and Jessore”, PLGB Judicial, May 1860.

৮৩. সতীশচন্দ্র মিত্র, পূর্বোক্ত, ২য় খণ্ড, পৃ. ৭৮৪ পাদটীকা।

৮৪. ব্রজেননাথ বন্দ্যোপাধ্যায়, পূর্বোক্ত, পৃ. ১০৮-১০৯।

নীলকরদিগের অত্যাচারের বিষয় আর কি লিখিব, যাঁহাদিগের অত্যাচারে উত্তর পূর্বাঞ্চলের কত কত ভদ্র সন্তান আপনারদিগকে পৈত্রিক বাসস্থান পরিত্যাগ করিয়া স্থানান্তরে প্রস্থান করিতে বাধ্য হইয়াছেন, এবং যাঁহাদিগের উপদ্রবে কত কত দীন দরিদ্র ব্যক্তি স্বাভাবিক হীনবল প্রযুক্ত অগত্যা অধীনতা শৃঙ্খলে বদ্ধ মনের দুঃখে কাল হরণ করিতেছে।”^{৮৫}

সংবাদ প্রভাকর পত্রিকায় এ বিষয়ে আরো উল্লেখ আছে, “নীলকরেরাই রাজ্য এবং হর্তাকর্তা যাহা মনে করেন তাহাই করিতে পারেন। তাঁহাদিগের অহিতাচার প্রতিকার হইবার কোন প্রকার সদুপায় হওয়া দূরে থাকুক ম্যাজিস্ট্রেট সাহেবদিগের সমীপে তাহার বিচারও হয় না।”^{৮৬} এমতাবস্থায় অনন্যোপায় হয়ে চাষীরা নীল চাষ করে। সেই কারণেই সমসাময়িক ‘বেঙ্গল হরকরা’ পত্রিকা নীলের কেকের একটি ব্যঙ্গাত্মক বিশ্লেষণ প্রকাশ করে। নিচের সারণিতে বিশ্লেষণটি প্রদর্শিত হলো।

সারণি-৫.৬ : একটি নীলের কেকের বিশ্লেষণ

উপাদান	--	শতকরা হার
মানুষের রক্ত (Human Blood)	--	৬৮.১৫
অপবিত্র যোগাযোগ (Unhallowed Connexion)	--	১২.৯৭
অত্যাচার ও প্রতারণা (Violence and Fraud)	--	১০.১৩
পুরাতন হিসাব (Old Balance)	--	৮.৪৭
নগদ অর্থ (Cash)	--	০.২৫
সততা (Honesty)	--	খুবই কম
মোট	--	৯৯.৯৭

বিঃ দ্রঃ বেঙ্গল হরকরা পত্রিকা ব্যঙ্গাত্মকভাবে উপরোক্ত বিশ্লেষণটি প্রকাশ করে। পরবর্তীতে হিন্দু প্যাট্রিয়ট তা পুনঃপ্রকাশ করে।

উৎস : *Hindoo Patriot*, 6 May 1860.

অবশ্য চাষীরা যে নির্বিকারে এসব অত্যাচার ও শোষণের শিকার হয়েছে তা নয়, বরং তারা বিভিন্ন সময়ে নীলকরদের বিরুদ্ধে প্রতিরোধ গড়ে তুলেছে।

নীলকররা শুধুমাত্র অত্যাচার করে তা নয়, তারা কিছু উন্নয়নমূলক কাজও করে।^{৮৭} এসব কাজের মাধ্যমে সাধারণ মানুষের উপকার হয়। নীলকররা রাস্তা ও সাঁকো নির্মাণ করে। এই কাজটি পল্লি এলাকায় মানুষের উপকারে আসে। নীলকররা বিভিন্ন স্থানে স্কুল ও হাসপাতাল নির্মাণ করে। এসব হাসপাতালে তারা বিনামূল্যে ঔষধ বিতরণ করে।^{৮৮} উদাহরণস্বরূপ ঝিকরগাছা কনসার্নের নীলকর হেনরি ম্যাকগিঞ্জর কথা উল্লেখ

৮৫. প্রদ্যোত সেনগুপ্ত, *বাংলার সামাজিক জীবন ও নাট্য সাহিত্য*। (কলিকাতা: ১৯৭৬) পৃ. ২৬৬-২৬৭।

৮৬. *ঐ*, পৃ. ২৬৭।

৮৭. সতীশচন্দ্র মিত্র, *পূর্বোক্ত*, ২য় খণ্ড, পৃ. ৭৮২।

৮৮. *Calcutta Review*, January-June 1847, Vol. VII, p. 215.

করা যেতে পারে। তিনি ১০০ ছাত্রের উপযোগী একটি স্কুল স্থাপন করেছিলেন।^{৮৯} তিনি চাষীদের মধ্যে বিনামূল্যে ঔষধ বিতরণ করতেন। মনে রাখা দরকার, হেনরি ম্যাকগিঞ্জ ছিলেন যশোর জেলার অন্যতম অত্যাচারী নীলকর। মাগুরা মহকুমার নীলকররা হাসপাতাল নির্মাণ করেছিল বলে ওয়েস্টল্যান্ড তার রিপোর্টে উল্লেখ করেছেন। তিনি লিখেন, “The charity hospital was erected about 1853-54, chiefly by subscription among the Indigo planters of the vicinity. It is a very good building of its sort.”^{৯০} ম্যাকগিঞ্জ ছাড়াও জেলার অনেক নীলকর চাষীদের বিনামূল্যে ঔষধ সরবরাহ করতো।

জমিদার হয়ে বাসার পর অনেক নীলকর চাষীর অভিভাবকের আসনে অধিষ্ঠিত হয়। চাষীরা বিভিন্ন গোলযোগ ও বিবাদ নিরসনের জন্য তাদের কাছে যেতো।^{৯১} উদাহরণস্বরূপ বলা যায় যে, মীরগঞ্জ কনসার্নের নীলকর ডান্লপের নিকট অনেক চাষী বিচারের জন্য যেতো।^{৯২} বলা বাহুল্য, নীল আন্দোলনের ইতিহাসে ডান্লপ অন্যতম অত্যাচারী নীলকর। ঔপনিবেশিক আমলে ইউরোপীয়দের মাধ্যমে প্রশাসন পরিচালিত হতো। প্রশাসনিক কাজে চাষীরা প্রথমেই তাদের পাশে অবস্থানকারী একজন ইউরোপীয় নীলকরের কাছে যেতো। অনেক নীলকর এক্ষেত্রে তাদের সহায়তা দেয়। অত্যাচারী নীলকর রেনিও চাষীদের এক্ষেত্রে সহায়তা দিতেন।^{৯৩} এছাড়া চাষীদের আরো একটি সুবিধা ছিল। নীল চাষ করায় তাদের অন্য কোনো মহাজনের নিকট যেতে হতো না। এর ফলে তারা মহাজন ও জমিদারদের ঋণের জাল থেকে রেহাই পেতো।^{৯৪} নীল কমিশনে সাক্ষ্য প্রদানকালে একজন ম্যাজিস্ট্রেট মন্তব্য করেন, “The benefit which I ascribe to Englishmen living in the district still of course remains, but of late years the ryot has become richer and is less dependent on adventitious assistance.”^{৯৫}

নীলকররা গ্রামাঞ্চলে রাস্তা নির্মাণ করে নিজেদের সুবিধার্থে। নীলের কারবার পরিচালনার জন্য এক কুঠির সঙ্গে অন্য কুঠির যোগাযোগ রক্ষা করা ছিল অত্যাবশ্যক। এছাড়া মাঠে উৎপাদিত নীলগাছ কুঠিতে আনার জন্যও রাস্তা নির্মাণের প্রয়োজন দেখা দেয়। ফলে তারা রাস্তা নির্মাণে এগিয়ে আসে। বেশিরভাগ ক্ষেত্রে বিভিন্ন কুঠির সংযোগ স্থাপন করার জন্য এসব রাস্তা নির্মাণ করা হয়। বিভিন্ন গ্রামে কুঠির অবস্থানের কারণে এগুলো গ্রামের সংযোগ স্থাপনকারী রাস্তায় পরিণত হয়। এসব রাস্তা নির্মাণের জন্য নীলকররা চাষীদের কাছ থেকে চাঁদা নেয়।^{৯৬} এক কথায় চাষীদের সহযোগিতায় নীল

৮৯. RIC Q 870.

৯০. J. Westland, *op.cit.*, p. 211.

৯১. BPP, 1859, Vol. IV, p. 346

৯২. RIC Q 2545.

৯৩. RIC Q 2588.

৯৪. RIC Q 2578.

৯৫. RIC Q 267.

৯৬. RIC Q 1394.

চাষের সুবিধার্থে নীলকররা এসব রাস্তা নির্মাণ করে। আর এই রাস্তাগুলো পরোক্ষ ভাবে চাষীদের উপকারে আসে। আবার মহানুভবতা বশত নীলকররা হাসপাতাল স্থাপন করেছিল, তা বলা যাবে না। এর পেছনে অন্য কারণ ছিল। ঔপনিবেশিক বাংলায় নীলকরদের জমিদার শ্রেণীর প্রতিদ্বন্দ্বী শ্রেণী হিসেবে বিবেচনা করা চলে। সামাজিক ক্ষেত্রে আধিপত্য বিস্তারের অভিপ্রায়ে তারা এসব কাজে লিপ্ত হয়। হাসপাতাল নির্মাণে অর্থ দান এবং চাষীদের মধ্যে বিনামূল্যে ঔষধ বিতরণ সমাজ ও সরকারের সামনে নীলকর শ্রেণীর ভাবমূর্তি সমুন্নত করে। একই কারণে তারা চাষীদের সালিশি ব্যবস্থায় অভিভাবকের আসনে অধিষ্ঠিত হয় এবং প্রশাসনিক পদক্ষেপ গ্রহণের ক্ষেত্রে চাষীদের সহায়তা দেয়। নীল চাষ আরম্ভের পর থেকে বিভিন্ন সময় চাষীরা এর অত্যাচার ও শোষণমূলক ব্যবস্থাদি প্রতিহত করার প্রয়াস পায়। নীলকরদের সামনে এ অবস্থাটি অভিপ্রেত ছিল না। চাষীরা তাদের এই অত্যাচার ও শোষণের বিরুদ্ধে যেন সংঘবদ্ধ প্রতিরোধ গড়ে তুলতে না পারে, সেই জন্য তাদের বিনামূল্যে ঔষধ দিয়ে সান্ত্বনা দেওয়া হয়। এছাড়া চাষীদের সুস্থ রাখা নীলকরদের প্রয়োজন ছিল। চাষীরা অসুস্থ হয়ে পড়লে নীল চাষ ব্যাহত হবে। তাই নিজেদের স্বার্থ রক্ষার খাতিরেই নীলকর চাষীদের চিকিৎসা সুবিধা প্রদান করে। চাষীদের ঋণ দিয়ে সহায়তা করার উদ্দেশ্যে ভিন্নতর। নীলকররা চাষীদের ঋণ দিয়ে মহাজনের নিকট ঋণ গ্রহণ থেকে বিরত রাখে। মহাজনের নিকট থেকে ঋণ গ্রহণ করতে দেওয়া হলে চাষীরা তার দান শোধ দিয়ে নীল চাষ থেকে মুক্ত হবার চেষ্টা করবে। এই ব্যবস্থাটিকে প্রতিহত করার জন্যই নীলকররা চাষীদের মধ্যে ঋণ বিতরণ করে। নীলচাষীদের নীলকর ছাড়া অন্য কারো নিকট থেকে ঋণ গ্রহণ নিষিদ্ধ করা হয়। এছাড়া নীলকরদের সুদের হার মহাজনদের প্রচলিত সুদের হারের চেয়ে বেশি ছিল। ফলে এ ব্যবস্থাটি চাষীদের আরো বেশি ক্ষতিগ্রস্ত করে।

নীল কুঠিতে অনেক কর্মচারীর দরকার হতো। বাঙালিরা কুঠিতে চাকরি পেতো।^{৯৭} এর মাধ্যমে কিছু মানুষের অর্থ উপার্জন ও জীবিকা নির্বাহের ব্যবস্থা হয়। নীল চাষ চাষীদের জমিদারদের খাজনা দেবার চিন্তামুক্ত করে। অনেক ক্ষেত্রে 'এলাকা' চাষীদের খাজনা দিতে হতো না।^{৯৮} অবশ্য পরবর্তী কালে প্রায় সব নীলকর খাজনা আদায় আরম্ভ করে। ফলে চাষীদের খাজনা প্রদানের ক্ষেত্রে সুবিধাজনক অবস্থাটি আর টিকে থাকেনি। এ সময়ে কোনো কোনো নীলকর এমনকি প্রচলিত হারের চেয়ে অধিক হারে খাজনা আদায় করতো।^{৯৯} ফলে চাষীরা বেশি দরিদ্র হয়ে পড়ে। পার্শ্ববর্তী বাকেরগঞ্জ জেলার তুলনায় যশোরের চাষীদের বাড়ি-ঘর অনেক খারাপ ছিল।^{১০০} মনে রাখা দরকার, যশোরে ব্যাপকহারে নীল চাষ হয়েছিল। অন্যদিকে, বাকেরগঞ্জে তেমন নীল চাষ হয়নি।

৯৭. RIC Q 2591.

৯৮. RIC Q 2545.

৯৯. এমনকি বেশি খাজনা শোধ করতে না পারলে চাষীকে জমি থেকে বিতাড়িত করা হতো। দেখুন, RIC Q 2722.

১০০. RIC Q 2591.

অবশ্য, নীল চাষ সরকারকে সুবিধা প্রদান করে। অতিরিক্ত লাভের ফলে নীলকররা নিয়মিত রাজস্ব দিতো। এতে অনাদায়ী রাজস্বের পরিমাণ হ্রাস পায়। সরকার অর্থনৈতিক নিরাপত্তা লাভ করে। এছাড়া নীল চাষে আবাদি জমির পরিমাণ বাড়ে।^{১০১} ১৭৭০ খ্রিষ্টাব্দের দৃতিক্ষেপে বাংলার এক-তৃতীয়াংশ মানুষ মারা যায়। আবাদি জমির পরিমাণও হ্রাস পায় আশঙ্কাজনক ভাবে। কর্নওয়ালিসের মতে, এ সময়ে বাংলার এক-তৃতীয়াংশ জমি অনাবাদি হয়ে পড়ে। ১৭৭২ খ্রিষ্টাব্দে জেমস রেনেলও বাংলার বিস্তীর্ণ এলাকা পতিত ছিল বলে উল্লেখ করেছেন।^{১০২} এ অবস্থাটি পরবর্তী দুই দশক পর্যন্ত বর্তমান ছিল। কাজেই নীলকরদের আগমনের সময় বাংলায় পরিত্যক্ত জমির অভাব ছিল না। পতিত জমির প্রাচুর্য তাদের এদেশে নীল চাষে আকৃষ্ট করে। এসব জমিতে নীল চাষ করা হলে আবাদি জমির পরিমাণ বৃদ্ধি পায়।^{১০৩} যশোর জেলায়ও একই অবস্থার সূচনা হয়। নীলকরদের আগমনের ফলে জেলায় আবাদি জমির পরিমাণ বৃদ্ধি পায়। নীল কমিশনের নিকট সুন্দরবনের কমিশনার জে. এইচ. রেলি মন্তব্য করেন, "Great quantities of waste land... have been brought into cultivation by Planters... much land has been rendered fit for cultivation."^{১০৪}

৫.৩ ঔপনিবেশিক সরকার প্রবর্তিত আইন ও নীলকর

ইতোমধ্যেই আলোচিত হয়েছে যে, নীলকররা অনেক অত্যাচার ও শোষণের মাধ্যমে চাষীদের দিয়ে জোর করে নীল চাষ করাতো। এতো অত্যাচার ও শোষণের পরেও তারা নীল চাষ টিকিয়ে রাখতে পেরেছিল সরকারের আইনগত সহযোগিতার কারণে। নদীয়ার বিভাগীয় কমিশনারের ভাষায়, "...of the Bengal system of Indigo cultivation, it would appear to have been one entirely of contract with the Ryots, a system which Government then and have since encouraged."^{১০৫} সরকারের এই আইনগত সহযোগিতার ধারা বুঝা গেলে বাংলায় নীলকরদের অত্যাচার চালানোর অন্তর্নিহিত কারণ অনুধাবন সহজ হবে।

বাংলায় অবস্থানকারী নীলকরদের বেশ কিছু আইনানুগ সুবিধা ছিল। ব্রিটিশ পার্লামেন্ট ও রাজা, ভারতের গভর্নর জেনারেল এবং বাংলার লেফটেন্যান্ট গভর্নর বিভিন্ন আইন প্রবর্তন করে ও আদেশের মাধ্যমে তাদেরকে এসব সুবিধা প্রদান করে।^{১০৬} ইউরোপীয় নীলকররা এসব সুবিধা পেয়েছিল ভূমি অধিগ্রহণ, আদালতে

১০১. Amiyo Rao and B.G. op.cit. p. 17.

১০২. Ibid; ছিয়াত্তরের মন্বন্তরে ১ কোটি মানুষ মারা যায় এবং সমগ্র বাংলা বনভূমিতে পরিণত হয়। দেখুন, বঙ্গদর্শন, ৮ম বর্ষ, আশ্বিন, ১৩১৫, N.K. Sinha, The Economic History of Bengal, Vol. II, (Calcutta: 1968), p. 65.

১০৩. RIC Q 3024.

১০৪. RIC Q 2587.

১০৫. Letter From A. Grote Esq., Commissioner of the Nuddea Division, to the Secretary to the government of Bengal (No. 141Ct., dated the 7th November 1859), SRGB Indigo, Pt. I, p. 204.

১০৬. মোঃ রেজাউল করিম, "ঔপনিবেশিক বঙ্গদেশে নীল চাষ : নীলকর ও নীল চাষীর সম্পর্ক", ইনস্টিটিউট অব বাংলাদেশ স্টাডিজ জার্নাল (আইবিএস জার্নাল), ৯ম সংখ্যা, ১৪০৮/জুন ২০০২, পৃ. ৭।